

## Nein Pohl Kisinlikou Keieu ong Timoty

### *Oaralap en Kisinlikou wet*

Timoty, souleng pwulopwul men sang Eisia Tikitik. Eh nohno mehn Suhs, oh eh pahpa mehn Krihs. Timoty wiahla werek en Pohl oh sawasepe nan eh doadoahk en Rongamwahu. Eri, *nein Pohl Kisinlikou Keieu ong Timoty* audaudkidahr ire siluh me Pohl kin pwunopwunodki. Mwohn mehkoaros kisinlikou kiset mihmi ni kehkehlik ehu me uhwong padahk likamw nan mwomwohdiso. Soangen padahk wet me pid duwen doalpenehn lamalam en mehn Suhs oh mehn liki, me kin kahski dene sampah wet me suwed, oh dene aramas kakete alehdi mour soutuk sangete ni marain rir ehu oh sang ni tiahk en mweisang soangen kisin tungoal kei oh sang pwopwoud. Pil mie nan kisinlikou kiset soangen padahk kei duwen epwelpen mwomwohdiso oh duwen kaudok, pil duwen soangen aramas me konehng kaweid oh sewese mwomwohdiso. Ni imwilah, Pohl kaweidki Timoty duwen eh pahn wiahla ladu mehlel en Kraiss oh duwen pwukoa kan me mie reh ong soangesoangen pwihnen souleng kan.

Audepe ni Oaralap

Tepin kisinlikou 1.1-2

Kaweid me pid mwomwohdiso oh duwen soundoadoahk kan 1.3—3.16

Kaweid ong Timoty duwen eh doadoahk 4.1—6.21

<sup>1</sup> Sang Pohl, wahnpoaron en Sises Kraiss sang ni poaron en Koht atail Sounkomour oh Kraiss Sises atail koapworopwor—

<sup>2</sup> Ong Timoty, nei pwutak mehlel nan pwoson:

Koht Samatail oh Krais Sises atail Kaun en ketin kupwureiuk oh ketikihong uhk kalahngan, mahk, oh popohl.

*Kehkehlik me Uhwong Padahk Likamw akan*

<sup>3</sup> I men ke en mihmi Episos, nin duwen ei kehkehlingkihonguhkehr ni ei seiloakwohng Masedonia. Pwe mie aramas ekei me mi wasahn me kin wiewia padahk likamw ekei. Eri, padahkihong irail re en tokedihsang.

<sup>4</sup> Padahkihong irail re en mweisang poadopoad akan oh ireirekdohn eden mehn mahs ako, pwehki soahng pwukat kin kahrehda akamai; oh re sohte kin wia mehn kamwahu ong sapwellimen Koht koasoandi kan me sansalda sang ni pwoson. <sup>5</sup> Kahrepen padahk wet pwe en arihada limpoak me kin pwilisang ni mohngiong mwakelekel, sang ni kadeikpen loale mwahu, oh pil sang ni pwoson mehlel.

<sup>6</sup> Mie aramas ekei me sohpeisangehr mepwukat oh sapwungkilahr ar koasoakoasoipene mwahl akan. <sup>7</sup> Re kin men wiahla sounpadahk en sapwellimen Koht kosonned, ahpw re sohte wehwehki dahme re kin pein nda, de sohte wehwehki mehkan me re kin koasoia oh koapworopworki.

<sup>8</sup> Eri, kitail eseier me Kosonned en Moses me inenen mwahu mehlel, ma aramas pahn doadoahngki nin duwen kahrepe me e wiawihkidahr. <sup>9</sup> Mehlel, kitail en tamanda me kosonned akan kin wiawihda, kaidehn ong aramas mwahu kan, ahpw ong irail kan me kin kalap kauwehla kosonned kan oh wia me suwed kan, ong irail kan me sohte masak Koht oh me dipan akan, ong aramas rotorot akan oh me sohte poadidi kan, ong irail kan me kin kemehla samarail de inarail kan, ong sounkam aramas akan, <sup>10</sup> ong me kin nenek, ong me kin wiewia pwopwoud en ohl, ong aramas en kul kan, ong irail kan me likamw oh me kin wia kadehde likamw, oh pil ong irail kan me kin wia mehkot me kin uhwong padahk mehlel. <sup>11</sup> Iei ih padahk

me dierekdahr sang nan rongamwahu me likilikpe wiawihong ie pwe I en kasalehda, iei ih Rongamwahu lingan me pekederdo sang rehn Koht kalahngan.

*Kaping Sapahl pwehki Kalahngan en Koht*

<sup>12</sup> Eri, I kin kapingkalahngan ong Krai Sises atail Kaun, me ketikihong ie kakehlepen ei doadoahk. I kapingkalahngankihong eh ketin kupwurehda me ngehi me warohng, oh ketin idihiehda pwe I en papah, <sup>13</sup> mehnda ma I lahlahwe mahso, oh pil kaloke oh kauwe. Ahpw Koht ketin mahkikihong ie pwehki ei saikinte pwoson me kahrehiong ie ei sehse dahme I wiewia. <sup>14</sup> Oh atail Kaun ketin kapwildohng pahi reken sapwellime kalahngan poatopaat, oh pil ketikihong ie pwoson oh limpoak me kitail ahnekipene ni atail miniminiong Krai Sises. <sup>15</sup> Eri, met koasoi mehleh pwoat, me kitail en ale unsek oh kamehlele: me Krai Sises ketido nin sampah pwe en komourala me dipan akan. I suwedsang irail koaros; <sup>16</sup> ahpw pwehki iei kahrepe wette me Koht ketin mahkikihong ie, pwe I en kak kasalehda uwen laud en Krai Sises eh ketin kanengamahiong ie. Mehnda ma I suwedsang me dipan akan koaros ahpw I en wiahla mehn kahlemengih ehu ong koaros me pahn pwoson Krai mwuhr oh ale mour soutuk. <sup>17</sup> Eri, ong Koht metehmen, Nanmwarki poatopaat, me sohte kak pwoula, oh me sohte sansal—lingan oh wahu en kowohng sang met oh pil kohkohlahte! Amen.

<sup>18</sup> Timoty, nei seri, I likihong uhk kaweid wet nin duwen mahsen en kokohp me wiawihkin uhk mahso. Mahsen pwukat en wia omw tehtehn pei pwe ke en pei mwahu; <sup>19</sup> oh ke en kolokol omw pwoson oh kadeikpen loalomw en mwakelekel. Pwe mie aramas ekei me sohte kin dukiong kadeikpen loalarail, ahpw keselahr arail pwoson. <sup>20</sup> Iet

riemen irail: Imenius oh Aleksander, me I mweidohng ira pahn manaman en Sehndan pwe ira en padahngki duwen ara solahr pahn lahlahwe Koht.

## 2

### *Kaudok en Mwomwohdiso*

<sup>1</sup> Eri, mwohn mehkoaros I men koangngoangehkin uhk pwe pekippek oh kapakap akan, anahn akan, oh kapingkalahngan, en kin wiawihong Koht pwehki aramas akan koaros; <sup>2</sup> pwehki nanmwarki kan oh me lapalap akan koaros, pwe kitail en kak momourki mour meleilei oh popohl ni atail kin poadidiong Koht oh wiewia me mwahu. <sup>3</sup> Met me mwahu, oh mehn kaparanda kupwur en Koht, atail Sounkomour, <sup>4</sup> me kin ketin kupwurki aramas koaros en ale komourparail oh marainkihla me mehlel. <sup>5</sup> Pwe Koht metehmen mie, oh emen pil mie me kin kadokepene Koht oh aramas akan, iei ih aramaso, Krai Sises, <sup>6</sup> me ketin meirongkilahr pein ih ong Koht pwe en ketin doarehla aramas akan koaros. Iet ih mehn kadehdeo, me pwarodo ni ahnsou me konehng, pwe en kasalehiong kitail me Koht kin ketin kupwurki aramas koaros en ale komourparail. <sup>7</sup> Oh iei kahrepe wet me I pekederkihdo nin duwen wahnpoaron men oh sounpadahk en mehn liki kan, pwe I en lohkiseli duwen sapwellime mahsen en pwoson oh mehlel. I sohte lokaia likamw, I lokolokaia mehlel!

<sup>8</sup> I kin men aramas koaros wasa koaros en kapakap, aramas poadidi kan, me kak kauwada pehrail kan ni kapakap ni soh lingeringer de akamai.

<sup>9</sup> I pil men lih akan en tiahk mwahu oh kanahieng arail likou kan, re en likoumwahuda, kaidehn ni arail pahn wiahda pitenmoangarail ni ehu soangen mwohmw, de

kapwatki kisin kohl kan, de takai kesempwal kan, de likou pweilaud kan; <sup>10</sup> ahpw ni wiewia mwahu, nin duwen me konehng lih poadidi kan. <sup>11</sup> Lih akan en padahngki nenenla ni karakarahk unsek. <sup>12</sup> I sohte kin mweidohng lih akan en padahk de ahneki manaman pohn ohl akan, ahpw irail en nenenla. <sup>13</sup> Pwe Adam me kepikipikda mahs, oh mwuri Ihp. <sup>14</sup> Pwe kaidehn Adam me lohdiiong widng mahs, ahpw liho me lohdi mahs oh kauwehla sapwellimen Koht kosonned. <sup>15</sup> Ahpw lih akan en mourkihla ar naineki seri, ma re pahn nantihong ni pwoson, oh limpoak, oh mour sarawi, nin tiahk mwahu.

### 3

#### *Kaun akan nan Mwomwohdiso*

<sup>1</sup> Koasoi mehlel pwoat met: ma mehmen kin men wiahla kaunen mwomwohdiso, e kin inengieng doadoahk mwahu. <sup>2</sup> Kaunen mwomwohdiso men uhdahn pahn pwung, e pahn pwoudiki lihtehmen, oh e pahn ese dahme e wiewia; kak kaunda nsene, oh ese koasoandi; e uhdahn pahn kasamwolong aramas en keiru men nan imwe; e uhdahn pahn kak padahk; <sup>3</sup> e sohte pahn kamam sakau, de lemei, ahpw kadek oh meleilei; e sohte pahn poakohng mwohni. <sup>4</sup> E uhdahn pahn kak apwahpwalih mwahu eh peneinei, oh nah seri kan pahn peikiong ni wahu unsek. <sup>5</sup> Pwe ma aramas emen sohte ese duwen eh pahn apwalih pein eh peneinei, a ia duwen eh pahn kak apwalih mwomwohdisohn Koht? <sup>6</sup> Dehr kasapwilada mehmen me ahpwtehn wiahla souleng, pwe e dehr aklapalapala oh riahla duwehte Tepilo. <sup>7</sup> Eri, mehmen me pahn pwaisanki pwais wet e uhdahn pahn ndand mwahu rehn aramas

2:9: 1 Pit. 3.3.

2:13: Sen. 2.7; b Sen. 2.21-22.

2:14: Sen. 3.1-6.

3:2: Tait. 1.6-9.

akan me saikinte wiahla souleng, pwe e de pwupwudiong nan lidip en Tepil oh sarohdi.

*Sounsawas akan nan Mwomwohdiso*

<sup>8</sup> Sounsawas akan en mwomwohdiso pil uhdahn pahn tiahk mwahu oh mehleh; re sohte pahn nim wain laud, de noahrok mwohni; <sup>9</sup> ahpw re uhdahn pahn kolokol ni soh peikasal pwosono me pwilisang rehn Koht. <sup>10</sup> Re pahn ale keseu mahs; ma re pweida, eri, mweidohng re en papah. <sup>11</sup> Arail werék kan uhdahn pahn tiahk mwahu, oh sohte lipahned; re pahn ese dahme re wiewia, re ahpw pahn mehleh ni soahng koaros. <sup>12</sup> Sounsawasepen mwomwohdiso men uhdahn pahn pwoudiki lihtehmen, oh e pahn apwalih mwahu pein nah seri kan oh eh peneinei. <sup>13</sup> Irail kan me wiewia doadoahk mwahu pahn kenikenla rehn aramas akan, oh re pahn kak eimah ni arail koasoakoasoa duwen ar pwoson Krai Sises.

*Irair Rir Kesempwal ehu*

<sup>14</sup> Ni ei ntingih kisinlikou kiset ong uhk, I koapworop-worki me I pahn kohwei oh tuhwong uhk ni ahnsou keren. <sup>15</sup> Ahpw ma I pahn pwandala, kisinlikou kiset pahn kehsehkin uhk duwen soangen mour me konehng kitail me towehda peneinei en Koht, met wehwehki mwomwohdisohn Koht ieias, me wia uhr oh poahsoanpen me mehlelo. <sup>16</sup> Sohte emen kak kahmahmki kesempwal en irair rir en atail pelien lamalam:

E ketin sansalda ni mwomwen aramas,  
     Ngehn Sarawi ketin kasalehda me ih me pwung,  
     oh tohnlang kan kilangehr.  
 Ronge pil lolohkselier nanpwungen wehi kan,  
     aramas akan kamehlele nin sampah,  
     oh e ketidahla nanlang.

## 4

*Sounpadahk Likamw akan*

<sup>1</sup> Ngehno ketin mahsanih ni sansal me ekei aramas pahn kesehla arail pwoson ni imwin ahnsou kan; irail pahn peikiong ngehn likamw akan oh idawehn padahk en ngehn suwed kan. <sup>2</sup> Padahk likamw pwukat kin kohsang ni widing en aramas kine likamw akan, me kadeikpen loalarail kan melahr, pwehki dihp me kakaun irail. <sup>3</sup> Soangen aramas pwukat kin kihwei padahk dene pwopwoud me sapwung, oh dene kang soangen mwenge kei pil sapwung. Ahpw Koht ketin kapikadahr kisin tungoal pwukat pwe aramas me pwoson akan me marainkilahr me mehlelo en tungoale mwurin arail pahn wia kapakap en kaping. <sup>4</sup> Soahng koaros me Koht ketin kapikadahr me inenen mwahu; oh sohte mehkot me kitail pahn soikala; ahpw soahng koaros kitail pahn ale ni kapakap en kapingkalahngan, <sup>5</sup> pwe mahsen en Koht oh kapakapo kin kahrehda en Koht eh pahn ketin kupwurki mepwukat.

*Ladu Mwahu men en Krai Sises*

<sup>6</sup> Ma ke kihong riomw souleng kan peneu pwukat, ke pahn wia ladu mwahu men en Krai Sises, ni omw pein katungoalehki pali ngenomw mahsen kan en pwoson oh padahk mehlel me ke kin idawehn. <sup>7</sup> Ahpw kalekeiukasang poadopoad akan me kin uhwong Koht, me sohte konehng en kin mie koasoiepe. Usehlahte Kaiakiahnih pali ngenomw pwe omw mouren souleng en mwahu. <sup>8</sup> Kaiahn en paliwar pil mie ekis katepe, ahpw kaiahn en pali ngehn me inenen katapan mehlel ni soahng koaros, pwe e pahn kahrehiong kitail mour ahnsou wet, oh pil ahnsou kohkohdo. <sup>9</sup> Met koaso mehlel pwoat, pwe kitail en ale unsek oh kamehlele. <sup>10</sup> Eri, ihme

kahrelda kitail kin nantihong oh doadoahk laudki pwe kitail kin koapworopworki Koht ieias me iei Sounkomour en aramas koaros, ahpw mehlel en irail kan me kin pwoson.

<sup>11</sup> Eri, ke en padahkihong irail oh panawihekin irail mepwukat. <sup>12</sup> Ke dehr mweidohng emen en mwamwahlikin uhk pwehki omw pwulopwul, ahpw ke en wia mehn kahlemengih ehu ong irail kan me pwoson, ni omw koasoi, ni omw tiahk, ni omw limpoak, ni omw pwoson oh mwakelekel. <sup>13</sup> Lel ei pahn pwarowei, nantihong wadewadek Pwuhk Sarawi ong aramas akan, oh pada-padahkih oh panapanawih irail. <sup>14</sup> Ke dehr mwamwahliki kisakis en ngehn me mihmi rehmw, me kohienguhkehr ni ahsou me soukohp akan mahsen oh me mah kan pwil pehrail pohmw. <sup>15</sup> Pwerisekiong oh poadidiong wiewia soahng pwukat, pwe aramas koaros en kak kilang omw kekeirda. <sup>16</sup> Kanakanahieng pein kowe oh pil kanahieng omw padahk kan. Nantihong wiewia soahng pwukat, pwe ma ke pahn wia, ke pahn doarehla pein kowe oh pil irail kan me kin rong uhk.

## 5

### *Omw Pwukoa ong Souleng kan*

<sup>1</sup> Ke dehr lipwoare ohl laud, ahpw kamantikih duwehte omw pahpa men. Wiahki mwahnakapw akan riomw, <sup>2</sup> oh lih laud kan omw nohno, oh peinakapw akan riomw serepein, ni tiahk pwung koaros.

<sup>3</sup> Wauneki liohdi kan me kelekelehpw. <sup>4</sup> Ahpw ma liohdi men mie nah seri, de nein nah seri kan, irail uhdahn pahn kapwaiada mahs arail pwukoa doadoahk ong arail peneinei, pwe iei duwen arail pahn dupukohng arail pahpa oh nohno kan, de arail pahpa oh nohno kahlap akan; oh iei me Koht kin ketin kupwurperenki. <sup>5</sup> Liohdi



men me kelekehlpw, me sohte nah seri mehn apwalih, kin koapworopworki Koht, oh kin poaden kapakap oh peki Koht en ketin sewese nipwong oh nin rahn. <sup>6</sup> Ahpw liohdi men me kin mweidohng paliwere ong peren mwahl, e melahr, mehnda ma e momour. <sup>7</sup> Kihong irail padahk wet, pwe emen de kedipahkin irail mehkot. <sup>8</sup> Eri, ma emen sohte kin apwalih kiseh kan, ahpw mehleh uhdaahn kisehn pein eh peneinei, e kahmahmkilahr eh pwoson, oh e suwedsang irail kan me sohte arail pwoson.

<sup>9</sup> Ke dehr kapatahiong emen liohdi ong ni irek en eden liohdi kan, ma e saikinte lel sounpar woneisek. Pil eh, e uhdaahn pahn pwopwoud paktehpak, <sup>10</sup> oh adamwahuki eh wiewia mwahu: eri, lih emen me kakairada mwahu nah seri kan, me kin kasamwo mehn keiru kan ong nan imwe, me kin widen nehn sapwellimen Koht aramas akan, me kin sewese aramas akan nan ar apwal akan, oh kin poadidiong wiewia doadoahk mwahu.

<sup>11</sup> Eri, ke dehr kapatahiong eden liohdi pwulopwul kan ong irekidien eden liohdi kan, pwe ni ahnsou me irail pahn inangihada pwopwoud, irail kin sohpeisang Krais, <sup>12</sup> oh kahrehiong ar kin dipikihda arail kauwehla arail inoun mahs ong ih. <sup>13</sup> Re kin pohnkahke ni ar kin kohsang ni eh, ihmw kolahng ni eh, ahpw me suwedsang, arail kin lipahned oh liderewes, oh koasoakoasoia soahng kan me sohte kin konehng irail en koasoia. <sup>14</sup> Eri, I anahne liohdi pwulopwul kan en pwopwoudida, naineki seri, oh apwahpwalih imwarail kan; pwe re en dehr mweidohng ahnsou mwahu ong atail imwintihti kan re en kin kauwe kitail. <sup>15</sup> Pwe ekei liohdi keselahr ar pwoson oh idaweihn-lahr Sehdan. <sup>16</sup> Ahpw ma lih emen me liohdi kei mi nan eh peneinei, e uhdaahn pahn apwahpwalih irail, ahpw e sohte

pahn kedirapwahki mwomwohdiso; pwe mwomwohdiso pahn apwahrpwalih liohdi kan me sohte epwelparail.

<sup>17</sup> Me mah kan me wiewia doadoahk mwahu duwehte sounkaweid kan, irail uhdahn pahn ale pweipwei laud, met me mehlel ong irail me kin doadoahk laudki arail padahk oh peneu. <sup>18</sup> Pwe Pwuhk Sarawi mahsanih, “Ke dehr pirepene ewen kouwol men ni ahnsou me e tietiak kohn kan,” oh “Tohndoadoahk men uhdahn pahn ale pweine.” <sup>19</sup> Ke dehr rong kadip ehu me uh Wong me mah men ma sohte sounkadehde riemen de silimen. <sup>20</sup> Panawih ni sansal irail koaros me kin wiahda dihp, pwe meteikan en pil masak.

<sup>21</sup> Mwohn silangin Koht, oh Krais Sises, oh tohn-leng sarawi kan, I pangenkin uhk ke en peikiong peneu pwukat. Ke dehr suwedki de pouperki emen ni soahng kan me ke kin wia. <sup>22</sup> Ke dehr kin karuaru en kasarawihala emen ong doadoahk en Kaun-o. Ke de ale pwaisomw nan dipen meteikan, a ke en kamwakele pein kowe.

<sup>23</sup> Ke dehr nim pihlte, a ale ekis wain me itar pwe en sewese paliweromw, pwehki omw kin kalap soumwahu.

<sup>24</sup> Dipen ekei aramas kin sansal, oh diparail kan kin tiengla mwohrail oh kadeikirailda; a dipen ekei kin sansalda mwuhr. <sup>25</sup> Pil duwehte, wiewia mwahu kan kin inenen sansal mwahu, oh pil wiewia mwahu kan me sohte nohn sansal sohte kak rirla.

## 6

<sup>1</sup> Eri, lidu kan koaros uhdahn pahn wauneki arail soumas akan, pwe emen de lahlahwe mwaren Koht de atail padahk kan. <sup>2</sup> Lidu kan me arail soumas pwoson-lahr sohte pahn mwamwahliki arail soumas pwehki irail koaros soulenglahr. Ahpw re pahn papah mwahu mehlel

---

5:18: Deud. 25.4; b Mad. 10.10; Luk 10.7.      5:19: Deud. 17.6; 19.15.

soumas pwukat, pwehki soumas ako me kin paieki en lidu ko ar doadoahk, iei riarail souleng me re kin poakohng.

*Padahk Likamw oh Pai Mehlel*

Eri, ke uhdahn pahn padahkihong irail oh panawihekin irail mepwukat. <sup>3</sup> Mehmen me kin wia ehu padahk tohrohr me sohte pahrekiong mahsen mehlel en atail Kaun Sises Kraiss oh pil ong atail palien lamalam, <sup>4</sup> iei ih me aklapalap oh sohte ese mehkot. E ahneki ineng suwed en akupwung oh akamaiki duwen lepin lokaia kan; oh met kin kahrehda luwak, saminimin, kauwe, lemelemehk suwed, <sup>5</sup> oh akamai sohte tokedi sang rehn aramas akan me arail medemedewe solahr doadoahk, oh me solahr ahneki me mehlelo. Irail kin medemedewe me palien lamalam, iei ehu ahl me re pahn kepwehpwehkihla.

<sup>6</sup>Eri, palien lamalam kin uhdahn kakepwehpwehla aramas, ma re itarki soahng kan me re ahnekiher. <sup>7</sup> Dahme kitail wadohng nin sampah wet? Sohte! A dahme kitail pahn wahsang nin sampah wet? Pil sohte! <sup>8</sup>Eri, ma kitail tungoalenki kisin tungoal akan oh likou, met e itarohng kitail. <sup>9</sup> Ahpw irail kan me men kepwehpwehla kin pwupwudiong nan songosong oh lohding nan lidip en ineng pweipwei oh keper tohto, me kin kauweirailla. <sup>10</sup> Pwe limpoak ong mwohni, iei tepin soangen suwed koaros. Mie ekei me kin inenen kasikasik en naineki mwohni, eri, re ahpw salongalangsang pwoson oh kauwehkihla mohngiongirail soangen kapahtou tohtohie.

*Peneu ong Uhk*

<sup>11</sup> Ahpw kowe, ohlen Koht men, kalekeiuk sang soahng pwukat koaros. Nantihong audaudkihda pwung, pwoson, limpoak, kanengamahiong apwal, kadek, oh omw mouren souleng en mwahu. <sup>12</sup> Tangowei uwen omw kak nan weirentang en pwoson, oh kalowehdiong uhk mour soutu, pwe iei mour wet me Koht ketin malipeiukohng

ni omw wiadahr kadehde mwahu en pwoson mwohn sounkadehde tohto. <sup>13</sup> Eri, mwohn silangin Koht, me kin ketikihong soahng koaros arail mour, oh mwohn silangin Krai Sises, me ketin wia kadehde mwahu ehu mwohn Pontius Paillet, I ndaiong uhk: <sup>14</sup> Peikiong kosonned kan me kohieng uhk, oh kanahieng uhk sang soahng suwed kan koaros lao lel Rahno me atail Kaun Sises Krai pahn ketin pwarodo. <sup>15</sup> Koht pahn ketin poaronehdo ni ahnsou ehu me e ketin koasoanehdi. Ih Koht en kapai, oh ihete Kaun en mehkoaros, Nanmwarkien nanmwarki kan, oh Kaun en kaun akan. <sup>16</sup> Iei ihete me sohte kak pwoula; e kin ketiket nan marain me nohn lingan me sohte emen kak karanih. Sohte emen me kilangehr, oh sohte emen me kak kilang. Ong ih wahu, oh manaman poatopoa! Amen.

<sup>17</sup> Panawiheki koaros me kepwehpwe nan mour wet re en dehr aklapalap, oh dehr koapworopworki soahng kan me sohte kin tengeteng, duwehte atail kepwehpwehn sampah; ahpw re en koapworopworki Koht, me kin ketin kalahngan oh me kin ketin sapankihong kitail soahng koaros pwe kitail en peren. <sup>18</sup> Panawihekin irail re en kin wia me mwahu, re en kepwehpwehki doadoahk mwahu, re en sapan oh perenki sewese meteikan. <sup>19</sup> Ih duwen met ar pahn kaunopada ehu pai kesempwal ong pein irail, me pahn wia ehu poahsoan kehlail ong ni ahnsou kohkohdo. Eri, irail ahpw pahn kak lelohng ni mouro me uhdahn mour mehleh.

<sup>20</sup> Eri, Timoty, kanakanahieng dahme kohieng uhk ni likilik pwe ke en apwahpwalih. Kalekeiukasang koasoi kan me kin uhwong Koht, oh akamai mwahl akan me ekei aramas kin kahdaneki “Loalokong.” <sup>21</sup> Pwe ekei kin koasoi me irail pil ahneki “Loalokong” wet, oh ni imwilah re kin salongasang elen pwoson.

1 TIMOTY 6:21

13

1 TIMOTY 6:21

Kalahngan en Koht en ieiang kumwail koaros.

Pohnpeian Bible with Apocrypha  
The Holy Bible in the Pohnpeian language of the Federated States of  
Micronesia

copyright © 2006 Bible Society of the South Pacific

Language: Pohnpeian

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-09-08

---

PDF generated using Haiola and XeLaTeX on 13 Mar 2019 from source files dated 13 Mar 2019

7ff9a0a6-6024-5540-a190-762a68918ebc